

Recordán unas bibenzias de l'amigo Netalí

Baldirón d'el RAC

Qué fresco tengo el recuerdo
de cuan a las Nazionals iban,
a trabiés d'un afoto que guardo
n'el que tu, debán de toz salibas,
asentau a'l suelo chunto a to'l grupo
de toz los que ba acudir aquel día,
costodiaus por D. Ángel el maistro
que de contino a la pocha i teniba
un reglle pa calentar a bel dolén
u a'l qu'en dominche a misa no acudiba.

Mos ha llobiu prou dend'antonzes
y sen aún unos mocosos zagalons,
anda la era Bardaixí bellas tardes
mos escapaban a chugar a'l fumbol,
cuan un día tu, sin querer fer-lo,
me bas arrear un fuertismo patadón,
pero sen sabedor d'el tuyo pobllema
el dolor ba ser mucho más chicorrón;
la pilota botiaba lloca de contenta
a'l llibrar-se de la patada de Netalón.

Más adebán te se beyeba repartín
las bebidetas que bendeba Torregrosa,
con un carrichón d'aquellos de mano
que dominabas como cualesquier cosa,
anda que un día dolén, sin asperar-lo,
un auto esbocau s'achupiba de gasiosa,
y después d'aber-te-lo estricallau tot
tu a'l menos te bas salbar de la fosa,
a'l tenir a l'Ángel de la Guarda a lau
pa protejer-te and'aber-te dixau en casa.

Cuantismas tardes te'n ibas a rezar
a'l bibir a l'empinau carrer d'el Molino,
con la chen d'el barrio las Pueblas
el ferboroso rosario que de contino
se fa una bez cantau el terzer toque

que los zagalez boziferan con estilo,
en tanto fan tingllar la tringoleta
entre correntidas por toz los callizos,
fen-le onor a san Juaquín y Santa Ana,
los Patrons d'ixe piazo tan castizo.
Tos arrimábaz chusto debán la capilleta,
entre casa Monguilán y Saún el bezino,
unos de peu y asentaus, otros en banquez,
siguíbaz los rezos de tan azertau destino;
eba pa la fiesta que se zellebraba antes
con ronda, baile y rico malacatón con bino.

Cuan si por orden d'el señor alcalde
febas sonar aquella boñada trompeta
pa que s'anterasen ben de los "bandos"
las chens de bel carrer u pllazoleta,
qué ben afinaban toz las orellas
dende cualesquier rincón anda casa Pepeta,
los asumaus en bentanals y balcones
u los de los porches de casa Pentineta.
Y pregonabas l'allegada de bel cambión
si a la pllaza pllantaba la paradeta,
si s'eba perdiu algo d'importanzia
u si fumbol, fiestas u zine se feba,
onque si se iba a fer bel intierro
d'algún grausino que se moriba,
dixabas de lau l'istrumento de bufar
pa nunziar-lo a toque de campaneta.

Ya por la esquina de casa el Zeloso,
agún abrigau, cuantismo frío pelabas,
tratán de bender el cupón de la Onze,
que mui contenta la chen te compraba.
por ser tan serbizial y traballador
un reconozu buen retiro t'allegaba,
una bez cumpllius ya los tuyos quefers
dispués de tantas añadas traballadas.
Olbida-te de toz los sacrefizios pasaus
y disfruta la bida, que son dos días,
ara, que seiga asabelo de sana y feliz
é lo que yo te diseo tan solo d'entrada.

P'atender el combite de l'amigo Lluísón
t'he apatrusquiau ista coseta bersificada,
y pa que sepas de yo, si no t'acordas,
soi uno d'ixos que tanto aman la bida,
el que t'aprezia y recorda con afeuto,
que Baldiret de chicorrón me llamábaz,
y de grandichón me diban Baldíri,
pero menos Colomina, de to las trazas;
ara, como ya m'he fecho prou duro,
Baldirón me fará llamar de por bida.

Soi aquel desintresau y callau grausino,
el que asabelas postals t'escribiba,
siempre que tu allegabas a pedir-me-lo,
u millor dicho: cuan tu me lo pedibas.
Qué contento me feba, amigo Netalí,
de poder-te serbir així, tan deseguida.
Estoi sofrín cuasi lo que a tu te pasa
por ixas cosas d'un destino tan desigual,
y onque pensem que isto ya é lo pior
ñ'hai áun d'otris que lo pasan más mal.

Ya no quiero ser guaire más llarguizo
porque me s'está acotolán to'l material,
rezibe un fortismo abrazo, queriu amigo,
y que seigas mui feliz en la Nabidá,
porque ista que ara ya tenim anzima,
ya caducada, nunco más mos tornaré.

[Felizitación nabideña de 1999 al barrio de san Juaquín y
Santa Ana de Graus]